

Гуьйре схъаеъна...

Кхоьлина 1аш хир ю хьо тховса корехь,

Хьо санна, цхьалха бутт хьан коре беъна...

Хиндерг и деригге хьуна ца гора,

Со нийса кхийти хьох: гуьйре схъаеъна.

Г1арг1улеш, мохк хуьйцуш, гена д1аяхна,

Дашо бос лепалуш, г1аш лаьтта эгна.

Хьан цхьалла тешаме йисина тахна,

Со нийса кхийти хьох: гуьйре схъаеъна.

Д1адевлларш ницкъ боцуш дага ца лаца,

Х1инца а тийжа хьо, б1архиш а лекъна.

Атта ца хилла-кха дерриг т1елаца...

Бехк биллац ас хьуна: гуьйре схъаеъна.

Шек доцуш ирсан де хирг хиларх кхана,

Къоначу безамах дара вай тешна.

Тахна, со цецвоккхуш, къоначарна а

Кхолламан макхъелла гуьйре схъаеъна.